

四庫全書

史部

欽定四庫全書

史部

欽定八旗通志卷

一百三十三
一百三十三

欽定四庫全書

欽定八旗通志卷一百三十

人物志十

宗室王公傳八

贈和碩親王靖定貝勒芬古
和碩親王惠獻貝子傅喇塔

贈

贈和碩親王靖定貝勒芬古

子尚善

芬古

顯祖宣皇帝孫追封莊親王舒爾哈齊第八子天聰五年

三月任鑲藍旗都統八月隨

上征明抵大凌河令諸將士分門而軍掘壕築塹以圍之
芬古率本旗兵圍城南之西斷明兵出入時貝勒
阿濟格敗明兵於松山

上將幸其營城中兵突來犯芬古等夾擊大敗之九月

上令軍士執幟馳向錦州如明援兵狀距城十里礮聲不

絕

上親率護軍兵設伏山隅總兵祖大壽見之果以為援兵
也率兵出城接應攻我西南隅軍臺芬古及葉臣

等出擊敵敗奔入城不敢出七年六月

詔問征明及朝鮮察哈爾三者何先芬古奏我軍蓄銳久
勢可用宜入明邊毀其城保圖進取八年五月大
兵往征察哈爾芬古先驅七月與貝勒德格類進
師獨石口攻長安嶺克之殺其守備攻赤城克其
郭復入保安州謁

上於應州城以所俘獲籍獻

上酌納之九年五月大兵復征明

命芬古同貝勒多鐸率護軍兵駐寧錦地界牽制明兵俾
毋援山西大壽營大凌河西我軍擊敗之崇德元
年五月隨武英郡王阿濟格征明薄延慶州先後
克城十十二月從征朝鮮同都統譚泰等率兵豎
梯入其城朝鮮王遁遂收其輜重還叙功封固山
貝子四年五月坐取外藩蒙古賄削爵八月復封
輔國公六年八月大兵圍松山明兵夜遁芬古率
所部追擊破之七年十月隨饒餘貝勒阿巴泰征

明抵薊州敗總兵白騰蛟等克其城八年十月與
輔國公博和託更番駐防錦州十二月卒順治十
年五月以次子尚善貴追封多羅貝勒謚靖定乾
隆十五年七月以曾孫德沛襲封和碩簡親王贈
如其爵尚善於順治元年四月襲封輔國公爵十
月晉封固山貝子二年正月隨豫親王多鐸南征
至潼關流賊李自成以三百騎橫衝我軍尚善同
貝勒尼堪擊敗之三月定河南五月渡揚子江平

江南並在事有功

上念其從征勤勞日久

賜圓補紗衣一襲金百兩銀五千兩鞍馬一五年八月同

英親王阿濟克勦天津土寇殲之十二月同謙郡

王瓦克達率師駐防大同六年十月晉封多羅貝

勒九年二月管理藩院事十月豫議政十五年正

月隨信郡王多尼征明桂王朱由榔於雲南薄其

城由榔奔永昌尚善同征南將軍卓布泰進攻鎮

南破其將白文選於玉龍關渡瀾滄江下永昌由
柳先遁乘勝取騰越州進勦南甸至孟村而還十

六年六月

賜蟒袍一玲瓏刀一鞍馬一十七年七月議尚善豫撤永

昌守門兵致軍士入城傷百姓降固山貝子康熙

十一年閏七月

上諭宗人府以尚善性行端良凡事小心敬慎勤勞為國
復封多羅貝勒十二年六月任宗人府右宗正尋

以疾罷宗正是年冬逆藩吳三桂反陷貴州趨湖南攻澧州岳州諸處十三年正月

命順承郡王勒爾錦為寧南靖寇大將軍往征師次荊州

六月復

命貝勒尚善為安遠靖寇大將軍率師之岳州速滅賊尚

善至軍移書三桂其畧曰王以亡國餘生乞師我

朝殄滅賊寇為國雪耻為父復讐感我

聖恩傾心報

國蒙

恩眷顧列爵分藩榮施後嗣忠孝慈義之節炳于天壤富貴寵榮之盛絕於近代迄今三十餘年矣而晚節末路復類童昏頓喪初心自取顛覆竊為王不解也何者王藉言興復明室則曩者大兵入關奚不聞請立明嗣且天下大定猶為我計除後患翦滅明宗安在其為故主効忠哉將為子孫謀創大業則公主額駙曾偕入滇其時何不遽萌反側至遣

子入侍乃復背叛以陷子戮可謂慈乎如欲光耀
前人則王之投誠也祖考皆膺封爵今則瑩墓毀
棄骸骨遺於道路可謂孝乎為人臣僕迭事兩朝
而未嘗忠于一主可謂義乎不忠不孝不慈不義
之罪躬自蹈之而欲逞志角力收復人心猶厝薪
於火而云安結巢於幕而云固也諺云老將至而
耄及之王非老諄何乃至是如即輸誠悔罪

聖朝寬大應許自新毋蹈公孫述彭寵故轍赤族湛身為

世大倂三桂得書不報十一月尚善疏請發荊州
綠旗兵撥京口沙唬船五十並水手赴岳州進剿
從之十四年六月賊犯彝陵急遣舟師赴荊州絕
其運道十二月安親王岳樂由江西進取長沙尚
善分遣官兵助之仍自攻岳州十五年三月以舟
師敗賊於洞庭取君山十六年正月征南將軍穆
占由岳州赴長沙深入賊地

命尚善率水陸兵進援四月三桂奔衡州尋復入湘潭分

遣其衆侵兩粵

上命出征各將軍會議尚善請檄烏船四十精兵每佐領四名水陸夾擊十七年二月

上以尚善屢請增戰船曾未一大創賊寇令率所部每佐領兵五人駐守長沙而以岳樂統大軍取岳州尚善願統舟師克岳州以贖罪

上從其請遣湖廣總督蔡毓榮率標兵三千荊州綠旗兵二千馳赴岳州協擊六月賊將杜輝犯柳林嘴我

師迎擊會君山扁山舟師亦至合擊之賊敗走斬
獲甚多沉其船賊固守套湖峽總兵萬正色等又
擊破之捷

閏下部議叙八月薨於軍年五十有八十九年十一月延
議出師湖廣功罪尚善坐統兵退縮追削爵三十
七年五月以尚善第四子門度襲封輔國公門度
初於康熙七年正月封鎮國公二十五年十一月
任宗人府右宗正三十七年四月以情削鎮國公

時門度之弟鎮國公根度亦以乖張削爵五月

諭大學士曰門度根度乃貝勒尚善之子今兩公爵俱革
尚善別無公爵之子孫則其爵遂絕矣著交宗人府議
尋議奏門度之祖芬古係輔國公門度應襲公爵
得

旨門度著襲輔國公雍正四年十一月以病削爵以尚善
之孫裕綬襲裕綬原封鎮國公根度第四子初于
康熙五十五年正月授三等侍衛雍正四年十一

月襲封輔國公尋授散秩大臣九年五月管正藍旗覺羅學十三年十一月任宗人府左宗正乾隆五年十月卒謚敏恪六年二月以裕綬第六子嵩椿襲封奉恩輔國公十二年四月授散秩大臣十三年二月任正紅旗漢軍副都統閏七月授正藍旗護軍統領十四年五月遷鑲黃旗漢軍都統兼左翼前鋒統領十五年四月調鑲黃旗蒙古都統十月任宗人府右宗人十九年十二月管鑾儀衛

事二十二年正月授荊州將軍二十五年十二月
調西安將軍二十六年十一月授察哈爾都統二
十七年閏五月復任西安將軍二十九年十一月
與副都統成德互劾議嵩椿徇私保題官屬又不
將違例放債之沙爾圖及坐扣錢糧之佐領朱林
泰究叅等罪革任回京三十年正月任散秩大臣
十二月授綏遠城將軍三十二年十二月以不裁
轎夫餉銀革任三十三年九月署領侍衛內大臣

十月任正紅旗蒙古都統三十五年正月任右宗
人三十六年六月授內大臣三十七年十一月授
江寧將軍四十六年三月調綏遠城將軍四十九
年六月調寧夏將軍

贈和碩親王惠獻貝子傅喇塔

元孫興兆

傅喇塔贈親王貝勒芬古第四子順治二年二月
封輔國公十二月隨順承郡王勒克德渾征湖廣
凱旋

賜黃金五十白金千五年九月鄭親王濟爾哈朗往征湖

廣傳喇塔奉

諭叅贊機務兵至湖廣所向皆捷追賊至廣西生擒賊渠

賀鳳翔等凱旋

賜白金六百六年十月晉封固山貝子十六年二月以朝

叅失儀降輔國公十八年三月復封固山貝子康

熙十三年三月耿精忠據福建反六月

命傳喇塔為寧海將軍同奉命大將軍康親王傑書討之

賜帑金七百暨盛甲弓刀鞍馬師至浙江温州處州已陷
康親王駐金華傳喇塔進師台州十二月偽都督
曾養性偽總兵陳理屯黃瑞山擊之殺賊千七百
餘斬副將陳鵬等賊犯天台復破之紫雲山九里
寺十四年八月養性與叛鎮祖宏勲復犯台州遣
副都統吉勒塔布自仙居襲其後疾馳至半山嶺
破偽都督劉邦仁乘勝進攻黃巖至黃土嶺賊三
路來拒官兵大破之賊退據黃巖遂圍其城養性

夜遁偽副將朱鎮山以城降傅喇塔復自黃巖進
温州敗賊於上塘嶺及小河渡先後復太平樂清
青田三縣及大荆盤石二營十月攻温州敗賊於
南江十五年二月賊水陸四萬犯我軍遣吉勒塔
布等分路迎擊陣斬偽都督孫可得偽總兵李節
等三百餘員及賊兵二萬初傅喇塔之攻温州也
始以俟紅衣礮為詞繼云需戰船康親王疏以

諭責其前後言互異負委任

命尅期取溫州三月傳喇塔疏言臣屢奉康親王檄促心思惶惑以致語言違謬但臣前駐台州王以俟台州破後進閩臣得黃巖又云候取溫州以是責臣何辭相抵今蒙

皇上寬恩惟勒期速下溫州臣敢不力戰自効但環溫皆水我兵不能猝進疏入

命康親王量留兵圍溫州親統大軍由衢州進取福建仍

諭之曰王貝子皆朕懿親受任討賊師克在和近覽王貝子章奏似不相和睦嗣後務同心一志合謀合力以奏膚功是月傳喇塔亦留兵圍溫州偕吉勒塔布勦處州賊以入閩六月師過三角嶺溯甌江將抵得勝山養性等聯船百餘泊江中復立兩營於對山及得勝山下之古溪分扼水陸列火礮拒守遂遣吉勒塔布及總兵陳世凱等分隊攻古溪伏兵林中邀賊歸路賊敗我伏兵起截殺賊船并對江賊營

皆為我漢軍礮所碎水陸俱潰進師至溫溪渡口
偽都督馬成龍偽總兵陳貴等賊兵五千餘來犯
奮擊敗之降其都司以下各偽官尋會康親王軍
於衢州八月偽騎都尉連雲登等賊二萬餘據雲
和縣石塘嶺傅喇塔率副都統穆赫林等進擊殺
賊七千餘連破賊營二十有八復雲和九月大兵
抵福建耿精忠降浙江諸寇悉平十一月卒於軍
喪還

特遣內大臣一等公頗爾盆至天津迎奠謚曰惠獻十七

年七月

諭宗人府曰貝子傅喇塔係宗室懿親為國宣力躬履行間勦禦賊寇撫綏兵民平定地方勲猷茂著積勞薨逝深為可憫理應優卹以示朕酬庸之意不拘定例著封其子富善仍為固山貝子次子福存為鎮國公乾隆五年十二月傳喇塔入祀浙江賢良祠六年四月復入祀福建賢良祠十五年七月以孫德沛龍和碩

簡親王贈如其爵傳喇塔次子富善康熙六年封
鎮國公十七年七月襲封固山貝子十九年十一
月任宗人府右宗正二十四年九月轉左宗正二
十九年十二月以病乞解任

諭責富善所行乖亂有負眷念交宗人府嚴議處削爵傳
喇塔第五子福存康熙十七年七月封鎮國公三
十年十月襲封固山貝子三十九年九月卒年三
十有六乾隆十五年七月以子德沛襲封和碩簡

親王贈如其爵福存次子德普康熙三十九年十
二月降襲鎮國公雍正元年四月任宗人府宗正
十月任正黃旗滿洲都統預議政七年五月卒年
四十有七八月以德普長子恒魯降襲輔國公乾
隆七年四月授散秩大臣十年二月授正紅旗漢
軍副都統五月授鑲藍旗護軍統領十三年閏七
月授工部侍郎十五年五月授宗人府右宗人二
十四年六月授綏遠城將軍二十五年調吉林將

軍三十四年調

盛京將軍三十七年正月授內大臣六月卒年五十
有一謚恭愍恒魯次子興兆乾隆三十年十二月
封二等輔國將軍三十七年襲封奉恩輔國公尋
授正黃旗護軍統領又

命為領隊大臣出征金川旋授宗人府右宗人三十九
年勦賊于當噶拉得里絨布寨卡卡角庚特額
等處九月即軍前授荊州將軍四十年大軍征得

楞基木斯丹當噶薩克薩谷甲雜獨古木等處並
有功金川平圖像

紫光閣

御製贊曰憶當國初創業開基宗室王公宣力率師承
平襲慶安享榮華董軍建勲斯為可嘉四十一年

二月回荊州任

欽定八旗通志卷一百三十

欽定四庫全書

欽定八旗通志卷一百三十一

人物志十一

宗室王公傳九

原封和碩英親王阿濟格

原封和碩英親王阿濟格

阿濟格

太祖高皇帝十二子母曰大福金烏刺納蘭氏生子三

長即阿濟格次睿王多爾袞次豫通親王多鐸並

著勲烈有大名阿濟格初授台吉天命十年十一月隨貝勒蒙古爾泰等征察哈爾至農安塔林丹汗遁乃還十一年四月同台吉碩託征喀爾喀巴林部十月蒙古喀爾喀扎魯特背盟隨大貝勒代善等往聲其罪執巴克父子三人及拉什希布岱青多爾濟桑阿爾齋等十四貝勒又斬鄂爾寨圖貝勒盡俘其家口牲畜是年封貝勒天聰元年正月同二貝勒阿敏等征朝鮮克五城朝鮮屈服請

和阿濟格在事有功五月從

上征明同莽古爾泰等率偏師衛塔山運糧士卒遇明兵
二萬擊敗之會大軍於錦州進薄寧遠城北明援
兵千二百掘壕以車為營列火器以拒阿濟格同
大兵擊殲之明總兵滿桂出寧遠東二里陣

上欲進擊諸貝勒以距城近不可攻勸阻甚力惟阿濟格
請從戰

上因率以前進命侍衛諸將俱戴兇盔馳衝敵敗明前隊

騎兵追至城下大殪之諸貝勒愧憤不及冒馳進
分擊步卒斬馘無算三年八月同貝勒濟爾喀朗
等略明錦州寧遠焚其積聚俘獲三千十月

上親統大兵伐明分三路進阿濟格同貝勒阿巴泰率左
翼四旗及蒙古兵從龍井關入夜半克之黎明毀
水關進明漢兒莊副將易愛洪山口叅將王遵臣
聞礮來援擊斬之殲其衆進圍漢兒莊守將李豐
降十一月大兵克洪山口至遵化州山海關總兵

趙率教來援阿濟格率左翼兵擊敗之會

上以數騎巡視遵化城垣遮擊其敗兵阿濟格追斬率教
於陣並戮其所屬副將以下官遂進逼京城明寧
遠巡撫袁崇煥錦州總兵祖大壽來援屯廣渠門
外

上命阿濟格同莽古爾泰等率兵迎擊追殺至城壕阿濟
格馬被創死始還十二月同阿巴泰等往畧通州
焚其船進克張家灣尋與諸貝勒隨

上往視薊州形勢明山海關兵五千來援距薊州二里許
與我兵遇不及入城遂列營相拒同諸貝勒等突
入敵營殲之阿濟格乘馬又被創死四年二月大
兵凱旋途遇敵兵踞山築壘阿濟格同衆貝勒破
之斬級六十獲馬八五年八月大兵將征明阿濟
格奉

命同貝勒德格類岳託率二萬人由義州進大凌河與大
軍會夜圍錦州敵兵六千襲攻阿濟格營時大霧

人覲面不相識及敵將至忽有青氣自天下衝敵營霧中開如門於是阿濟格岳託列陣進頃之霧霽急擊敵兵敗之追殺至錦州城生擒遊擊一獲甲械及馬匹各二百旗纛十五

上幸阿濟格營親勞酌金卮

賜之

上以阿濟格及碩託等每戰必衝鋒陷陣

諭之曰爾等勿以敵寡而輕戰恐其出城誘我墮彼計中

也如敵兵大至則遣人來報朕當親往覘視以圖迎擊如敵衆前來下營可令廝卒預備裝載為旋軍狀以觀其動靜敵退則聽之如彼乘夜劫營即令廝卒避於僻地選精兵馳擊如敵營結定則移此處火礮擊之如值夜深臨卧我軍當時加瞭望以偵敵形尋聞明增兵來

援

命顏駙楊古利率八旗護軍之半往益阿濟格軍時明錦州兵七千逐我偵敵者於小凌河岸突近

御前護衛兵不滿二百

上擐甲渡河直入敵陣敗之阿濟格繼至敵復出步軍列城壕外騎兵翼其後阿濟格奮擊之敵望風遁破其步軍斬副將一擒把總一於是

上以所統兵留付阿濟格明監軍道張春等復以兵四萬援錦州我師迎擊於大凌河截殺者過半逐北逾一舍六年五月從

上征察哈爾林丹汗遁阿濟格統左翼及蒙古兵畧宣府

大同明兵懼盡獻張家口所貯犒邊財物七月師旋七年三月

命築通遠保城以兵駐守五月迎明降將孔有德等立營江岸明兵及朝鮮兵皆不敢追有德等輜重得畢至八月統兵畧山海關俘獲甚衆八年五月從

上征明自巴顏珠爾克入龍門口遇明兵敗之進攻龍門未下趨保安州克之斬其守備一謁

上於應州獻所獲八月拔靈邱斬其知縣守備各一師還

崇德元年叙功晉封多羅武英郡王五月

命同阿巴泰征明入邊連破雕鶚保長安嶺保薄延慶州
先後克定興安肅容城安州雄縣東安文安寶坻
順義昌平遇敵五十六戰皆捷俘獲人口牲畜共
十七萬九千八百有奇擒總兵曹丕昌等又遣都
統譚泰等設伏斬遵化三屯營守將殲其探卒我
師方出關明兵二百躡我後還擊殲之捷

開得

嘉獎

賜鞍馬一馬三九月凱旋

駕出盛京地載門十里迎勞之告祭畢行抱見禮

上見王遠征勞瘁為之惻然

命坐

御座側設宴以金卮酌酒

親賜之十二月

上親征朝鮮

命阿濟格駐防牛莊二年三月以貝子碩託等攻明皮島
久未下

命引兵千往助攻四月至軍夜遣都統薩穆什哈督護軍
兵前進續遣都統阿山葉臣率銳卒乘小舟疾攻
西北隅兵部承政車爾格統八旗驍騎及漢軍朝
鮮兵乘巨艦逼其城都統石廷柱戶部承政馬福
塔從北隅督戰遂克其島斬守島總兵沈世奎及
諸路來援者俘人口三千四百有奇獲大船七十

礮十貲畜無算

上遣使賫

諭褒嘉十二月遣軍自牛莊入白土場遇明兵七百造飯
清河岸突擊敗之四年二月從

上征明率師至大凌河東揚言以紅衣礮攻臺守卒咸懼
四里屯張剛屯寶林寺旺民屯于家屯成化峪道
爾彰等俱下尋率四旗護軍還守塔山連山倅人
馬千計四月班師九月畧錦州寧遠界六年三月

同鄭親王濟爾哈朗圍錦州立營掘壕為久困計
城中蒙古台吉吳巴什等密遣人議降為總兵祖
大壽所覺日薄暮整兵出城外接戰阿濟格夜至
城下助蒙古台吉等擊之明兵敗入城乃徙蒙古
及明兵降者於義州事詳鄭獻親王傳四月明援
兵自杏山詣松山阿濟格與鄭親王分統左右翼
兵設伏阿濟格伏松山北嶺令前鋒兵誘敵我伏
兵齊起前鋒兵返擊之右翼伏兵躡其後大敗之

斬級百七十獲馬百餘甲七十六月闕內援兵又
自松山城沿海進阿濟格率左翼兵從松山西襲
擊至松山城壕敗之獲馬五十餘七月

上以阿濟格克敵奏捷

賜白金四千八月明洪承疇率兵十三萬來援錦州

上親征大軍營松山明兵潰遁阿濟格等追至塔山還獲
其筆架山積粟十二堆復率兵往塔山邀擊明兵
之敗逃者斬馘無算又同睿親王多爾袞以礮克

駕還

敵臺四生擒副將王希賢叅將崔定國都司楊重
鎮等搜勦三日總兵吳三桂王樸奔杏山僅以身
免時錦州松山杏山高橋各路兵猶固守不下九
月

盛京阿濟格與諸王貝勒分兵困之十一月永疇夜
出松山兵六千犯我營我兵沿壕射之敵返走松
山城閉不得入收降其衆二千餘敵從杏山夜遁

者多為伏兵所殺三桂等走寧遠七年二月遣前
鋒統領鄂莫克圖等畧寧遠遣護衛及親軍策應
誘殺三桂等所遣追兵六百三月三桂等復率兵
四千駐塔山分兵至高橋與我哨卒接戰阿濟格
遣前鋒兵濟之敵不戰而退我兵追至連山斬三
十人生擒百戶一師逾寧遠城西十里審視運糧
海道明兵出城犯又敗之斬九十餘級獲馬十三
四月凱旋八年九月復同鄭親王濟爾哈朗統兵

征寧遠軍城北填壕塹布雲梯以紅衣礮急攻之城賴敵不支奔潰隳其城斬遊擊吳良弼都司王國安等二十餘員直抵前屯衛周視戰壘立營柵移礮星夜攻陷其城斬總兵李輔明袁尚仁等三十餘員兵四千餘明中前所總兵黃色棄城遁我兵追襲之復拔中前所順治元年四月同睿親王多爾袞入山海關破走流賊平定燕京有功十月

冊封和碩英親王旋

命為靖遠大將軍統兵由邊外入陝西征流寇二年二月入邊沿途剿賊八戰皆捷陝西屬城攻克者四投降者三十八時流賊李自成親帥賊兵十三萬并湖廣襄陽承天荊州德安四府所屬各州縣原設守禦賊兵七萬聲言欲取南京水陸並進我兵亦分水陸兩路躡其後追及於鄧州承天德安武昌富池口桑家口九江等處降者撫之拒者誅之窮追至賊老營連破之賊兵竄入九公山自成僅以

步卒二十人遁俘其偽趙侯偽襄南侯偽總兵左
光先偽軍師宋獻策等斬其兩叔父及偽汝侯劉
宗敏於軍是役也凡十有三戰皆大捷故明寧南
侯左良玉子夢庚執總督袁繼咸守道李猶龍巡
撫黃澍率總兵十二馬步兵十萬舟十萬詣軍門
降計所下河南屬城十二湖廣屬城三十九江西
屬城六南京屬城六皆設官撫定閏六月捷

聞

上祭告

郊

廟

社稷

諭嘉其運籌決勝懋著勲庸仍

遣侍臣赴軍中慰勞又

諭曰王克奏膚勲不勝喜悅念王及行間將士馳驅跋涉

懸崖峻嶺深江大河萬有餘里可謂勞苦而功高矣寇

氛既靖宜卽班師其招撫餘兵應留充軍伍或散歸田里王與諸大臣商推行之八月師旋方自成道時王誤以死

聞又不候

旨班師攝政王多爾袞傳語以王等有罪不遣迎但於午門候齊歸第復議前出師時脅宣府巡撫李鑑釋逮問赤城道朱壽鏊又擅取鄂爾多斯土默特馬降郡王尋復之五年七月

命統兵剿天津曹縣兩處土寇平之十一月喀爾喀二楚
呼爾行獵近我邊界

命出駐大同十二月大同總兵姜瓖聞大兵將至疑襲已
據城叛總督耿焞奔陽和附近十二城叛應賊兵
四出攻城邑阿濟格聞變星馳往圍大同城事

聞

特命阿濟格為平西大將軍率都統巴顏等會征姜瓖六
年正月賊黨劉遷攻代州據外郭章京愛松古遊

擊高得勝併蒙古兵俱被困遣端重郡王博洛等
往援大破之斬賊渠郭芳遷遁去三月攝政王至
大同會王兩福晉卒攝政王諭其先歸王啟云子
不希富貴但丈夫重名譽欲佐命効力流芳史冊
耳顧以妻死棄大事而歸乎卒不行四月復左衛
六月啟攝政王曰輔政德豫親王子功小不當優
異鄭親王乃叔父之子不當稱叔王當以已為叔
王攝政王乃數其妄思越分及私除職官等罪衆

議削其爵攝政王以其恃親冒請免罪令勿預部
務及交接漢官八月阿濟格復同貝子鞏阿岱統
兵征大同九月偽總兵楊振威斬姜瓖并其兄琳
弟有光諸軍門降大兵入城誅從逆吏民隳大同
城睥睨五尺班師還八年正月攝政王多爾袞薨
於喀喇河屯王赴喪次即急歸夜又不至而私召
其子勞親

上迎喪王又不去佩刀攝政王近侍額克親吳拜等發其

計圖攝政鄭親王等即於路監守之至京議削爵
幽禁降子勞親貝子革所管佐領閏二月復議移
繫別室籍其家子勞親等黜宗室十月監者告其
欲於獄中舉火衆議當正法得

旨賜自盡爵除乾隆四十三年正月

諭曰朕覽

實錄載英親王阿濟格秉心不純往追流賊誑報已死又
擅至沿邊索馬且向巡撫囑託公事過跡昭著雖前

此亦有微功不足以抵其罪黜爵實由自取至其子孫前此降為庶人削其宗籍

皇祖御極之初曾加恩將其次子傅勒赫復還宗支追封公爵遞襲其餘諸子仍除籍嗣於康熙五十二年復蒙

恩將第三子伯爾遜第八子佟塞第十子鄂拜第十一子班進泰各支賜給紅帶子附入

玉牒今思傳勒赫一支既已作為宗室襲爵其有後之伯

爾遜各支及無後之和度等同係英親王子孫似無庸復為區別因推廣

皇祖恩意着交宗人府一體查明復還黃帶子列入宗譜其恩封公爵遞襲世次詳

玉牒

欽定八旗通志卷一百三十一

欽定四庫全書

欽定八旗通志卷一百三十二

人物志十二

宗室王公傳十

追封多羅誠毅勇壯貝勒穆爾哈齊襄敏固山貝子務達海

勒巴雅喇

原封鎮國公漢岱追封多羅篤義剛果貝勒巴雅喇多羅安平貝勒杜度

追封誠毅勇壯貝勒穆爾哈齊

穆爾哈齊

顯祖宣皇帝第二子以功

賜號誠毅歲乙酉四月從

太祖高皇帝征哲陳部值大水遣衆兵回留八十人畧地
而前有嘉哈部長蘇庫賚呼者密告哲陳部主於
是托摩和章嘉巴爾達薩爾許界藩五城俱集兵
以待

上執麾前進穆爾哈齊及近侍延布祿烏靈阿隨

上直入重圍殺二十餘人敗其衆敵奔界藩爭赴渾河道

穆爾哈齊復隨

上渡河追躡其後至吉林崖立其巔見兵由旁徑來

上慮為敵所見去冠纓隱身以待射其前至者一人貫其

脊而殪穆爾哈齊又射殪其一餘多墜崖死

太祖曰今日之戰以四人而敗八百之衆乃

天助我也天命五年九月穆爾哈齊以疾卒年六十

上親往奠順治十年六月追封多羅貝勒謚勇壯爵除

襄敏固山貝子務達海

務達海誠毅貝勒穆爾哈齊第四子天聰八年十

二月授騎都尉崇德三年任刑部左叅政四年八月封三等輔國將軍五年二月任鑲白旗副都統十一月隨鄭親王濟爾哈朗圍錦州偵知敵於杏山塔山間運糧芻夜畧之擒斬甚衆七年六月擢刑部承政先是務達海隨貝勒阿巴泰征明分畧山東登州未至離衆先歸八年七月部議削世職罷副都統任

上免之祇奪所賞俘獲入官順治元年四月隨睿親王多

爾袞入山海關定燕京敗流賊李自成二年二月
叙功晉封二等輔國將軍四年正月以議鄭親王
造府踰制罪贍徇削世職六月晉一等輔國將軍
九月晉三等鎮國將軍五年三月同都統阿賴等
駐防漢中是年晉固山貝子六年四月同鎮國公
屯齊哈輔國公巴泰往大同更代英親王阿濟格
討叛鎮姜瓖八月仍

命阿濟格赴大同務達海還京七年五月任議政八年五

月攝都察院承政十一年十二月同定遠大將軍
世子濟度統官兵往福建征剿鄭成功中途疾

命回京十二年五月薨諡襄敏爵除

原封鎮國公漢岱

漢岱誠毅貝勒穆爾哈齊第五子天聰八年十二
月授騎都尉尋封一等奉國將軍崇德二年四月
與議政六年八月隨

上征明圍松山敗明總兵吳三桂等漢岱率所部追擊大

破之七年隨饒餘貝勒阿巴泰攻明薊州河間景
州克宛州十二月即軍前授兵部承政八年六月
凱旋

賜銀二百兩緞六疋順治元年四月隨睿親王多爾袞入
山海關擊敗流賊李自成叙功晉三等鎮國將軍
十月隨定國大將軍豫親王多鐸南征至潼關連
破流賊前營旋同副都統伊爾德侍郎尼堪等由
南陽路趨歸德克一州四縣四月渡淮克揚州獲

船百餘十月

賜金二十五兩銀千三百兩三年正月授鑲白旗滿洲都
統五月同貝勒博洛趨杭州追擊明魯王朱以海
於台州是月晉一等鎮國將軍十一月同貝勒博
洛進征福建破明唐王朱聿鍵之總兵師福於分
水關入崇安縣撫定興化漳州泉州叙功晉輔國
公五年四月同貝子屯齊征陝西逆回會總督孟
喬芳已擊斬米喇印丁國棟遂奉

命同謙郡王瓦克達貝子尚書等赴英親王軍駐防大同
六年七月隨親王滿達海勦賊朔州寧武克其城
移師攻遼州賊迎戰漢岱偕護軍統領希爾根鼐
敗之並降屯留襄垣榆社武鄉等縣七年十二月
任吏部尚書兼攝正藍旗都統八年二月調刑部
尚書三月以不陳奏英親王私藏兵器事削世職
罰鍰五月晉封鎮國公九年四月復調吏部尚書
七月隨定遠大將軍敬謹親王尼堪征湖南瀕行

賜蟒衣鞍馬弓矢刀帶等物十二月敬謹親王戰歿

上命貝勒屯齊代其軍漢岱亦合營十年三月擊敗明桂
王朱由榔之秦王孫可望等兵十一年十月追議
隨敬謹親王戰沒罪削爵十二年正月復任吏部
尚書二月加太子太保八月封鎮國將軍品級十
三年四月以河西務鈔關員外郎朱世德虧課萬
餘兩戶部援

赦免罪吏部亦弗置議廷議解漢岱任

諭曰漢岱於湖南失事情罪重大考之成憲即應正法朕念係宗室姑從寬免且加任用乃不思感恩報効圖蓋前愆反依阿蒙蔽負朕大恩本宜重處復念宗室從寬着革任削太子太保鎮國將軍品級爵除

追封多羅篤義剛果貝勒巴雅喇

子拜音圖

巴雅喇

顯祖宣皇帝第五子

太祖高皇帝之弟初授台吉歲戊戌正月

太祖命與長子褚英征安楚拉庫路夜取屯寨二十降萬

餘人

賜號篤義丁未年四月

命征東海窩集部取赫席赫鄂謨和蘇魯佛訥赫托克索

三路俘二千人天命九年九月薨年四十有三順

治十年五月追封多羅貝勒諡剛果爵除巴雅喇

第三子拜音圖初於天聰八年四月

太宗文皇帝加恩宗室授為三等子爵與功臣同六月隨

貝勒阿濟格迎察哈爾來降之土巴濟農九年十
二月授鑲黃旗都統崇德元年五月隨武英郡王
阿濟格征明畧保定府攻安肅縣克之九月師還
十月同諸王大臣以所獲陳獻

薦恭殿前部臣差等以聞

上曰朕聞拜音圖不忘君上俘獲之時即簡選收藏攜歸
進獻具見敬忱甚為可嘉十二月從征朝鮮以騎入其
城收其輜重三年十月睿親王多爾袞征明同都

統圖爾格敗敵於董家口毀邊牆入克青山關下
四城六年八月議拜音圖弟鞏阿岱隨大軍圍錦
州時臨陣退縮罪下王大臣會鞫拜音圖拂袖出
坐狗庇論死得

旨革職罷都統任並罰鍰尋率兵助睿親王軍於錦州復
同貝勒多鐸圍守松山七年六月復都統任順治
二年正月隨豫親王多鐸敗賊將劉方亮於潼關
是月封一等鎮國將軍三月

賜繡服一襲四月南征克揚州以舟師破其兵於江南岸
六月同貝子博洛攻下杭州十月叙功

賜黃金八十白金四千鞍馬一三年五月授三等公尋隨

豫親王擊敗喀爾喀部兵晉封鎮國公五年十一

月晉封固山貝子隨英親王阿濟格戍大同六年

九月攻叛鎮姜瓖餘黨於沁州賊遁拔其城復圍

偽道胡國鼎於潞安殲之十月晉封多羅貝勒九

年三月以依附睿親王削爵幽禁黜宗室爵除

多羅安平貝勒杜度

子杜爾祜
爾祜 薩弼

穆爾祜

特

杜度原封廣畧貝勒褚英長子

太祖高皇帝孫也初授台吉天命九年喀爾喀已約特部

台吉恩格德爾請移居東京杜度隨大貝勒代善

等徙其戶口來歸尋封貝勒天聰元年正月同二

貝勒阿敏貝勒岳託等征朝鮮屢戰皆捷朝鮮王

李倅懼遣使議和諸貝勒許之阿敏欲直趨其都

謂杜度可同往杜度變色曰

皇上乃吾叔父何可遠離耶遂與岳託等議定盟而還二

年二月

上征多羅特部

命杜度留守三年十一月隨

上征明薄京城明大同總兵滿桂宣府總兵侯世祿以兵

來援杜度與大貝勒代善等擊敗之又同貝勒濟爾哈朗率兵畧通州燬其船攻克張家灣

上班師至薊州遇明山海關援兵五千杜度等擊敗之事

具英親王傳十二月

命杜度統本旗兵往駐遵化四年正月明兵攻遵化杜度逆擊斬其副將一獲駝馬千計五年七月

上征明以杜度留守六年四月大軍征察哈爾杜度仍留守七年三月奉

命監築鹵場城五月明將孔有德耿仲明來降懼明及朝鮮兵阻截杜度同貝勒濟爾哈朗阿濟格等迎之於鎮江岸護其眷口輜重以來明及朝鮮兵不敢

追六月

詔問征明及朝鮮察哈爾三者何先杜度奏言朝鮮已在掌握宜緩征如察哈爾來逼則征之若尚遠可先取大同邊地秣馬以觀其勢如逼近察哈爾則往征之察哈爾若敗遁即深入明境若破察哈爾天下自然膽裂矣八年五月奉

命防守海州保邊禦敵崇德元年四月叙功晉封多羅安平貝勒九月明將造巨艦百餘橫截遼河為守禦

計守海州河口伊勤慎以

聞

命杜度濟其師敗却明兵而還十二月

上統兵征朝鮮遣杜度等護輜重後行

諭簡精騎畧皮島雲從島大花島鐵山島至則居民先遁

焚其廬舍二年二月抵臨津江時冰已泮不可渡
忽一夕大雨雪寒甚冰復凝越日軍數萬徑渡狀

聞

上喜曰嘉祥洊至皆

天意也是月同睿親王多爾袞取朝鮮王妻所居之江華
島我師將渡江敵船百餘列兩翼以拒杜度等督
舟師衝入發紅衣礮敵遁我兵登岸復擊敗其兵
千遂克其城朝鮮降三年二月

上親征喀爾喀杜度同代善濟爾哈朗留守併監築遼陽
都爾弼城是月明石城島總兵沈志祥挈屬來降
杜度運米濟之八月

命岳託為揚威大將軍征明杜度副之自密雲東北牆子
嶺入明兵千餘逆戰杜度督王延祚等擊敗之進
攻牆子嶺分兵入破明黑峪關古北口黃崖口馬
蘭峪等關尋岳託以疾薨於軍杜度總軍務與左
翼軍會於通州河西越京城西抵山西南抵濟南
降城克敵事具睿忠親王傳四年四月凱旋

賜馬二駝一銀五千八月

命管禮部事九月與貝勒濟爾哈朗等畧明錦州寧遠五

年四月

上巡視義州杜度留守六月與睿親王多爾袞往代鄭親王濟爾哈朗等於義州築城屯田七月明錦州兵由城西北隅來犯敗之又克城西九臺小凌河西岸二臺尋聞明總督洪承疇率兵四萬營杏山城外遂同諸王貝勒等迎擊敗其騎卒掩殺至城壕又率右翼兵伏寧遠路明兵自關內運米錦州殺其步卒三百餘八月前往錦州斬明兵出樵採者

八十六人又率師往杏山誘擊敵兵偵松山兵出
馳赴之三戰三捷敵遁九月代還十二月復同睿
親王等代鄭親王圍錦州六年二月攻廣寧山城
擊斬明松山援兵二百四十及錦州兵之出獵小
凌河者百七十餘人三月以聽從睿親王離城遠
駐遣兵私回論削爵奪所屬戶口

詔從寬罰鍰六月復圍錦州明關內援兵出松山戰敗其
衆追逐五里許八月從

上親征九月

駕還留杜度圍錦州七年六月薨於軍年四十有六時諸

王貝勒等方集

篤恭殿會議出征功罪而杜度之訃適至

上為之罷朝

命護軍統領圖賴等往奠以其長子杜爾祜降襲鎮國公

雍正二年立碑紀功杜爾祜初封輔國公崇德六

年八月隨

上圍松山敵夜遁諸將士相繼追擊杜爾祜恐後有敵兵少待已而無至者亦隨衆追擊大破其衆七年三月隨大兵圍錦州祖大壽以城降

詔杜爾祜還京六月降襲其父爵為鎮國公十月叅領拜山等首其怨望論削爵黜宗室籍順治元年十一月隨定國大將軍豫親王多鐸南征有功二年二月復封輔國公入宗室十月叙功

賜黃金五十白金二千五年九月隨鄭親王濟爾哈朗征

湖廣六年四月敗賊於永興抵辰州賊渠一隻虎遁追擊之進勦廣西定全州七年正月凱旋

賜白金六百事具鄭獻親王傳八年二月晉封多羅貝勒

九年十月任議政大臣十二年二月卒年四十有一謚曰愍厚以杜爾祜第五子敦達降襲固山貝子康熙十三年九月卒謚恪恭以敦達次子普貴降襲鎮國公三十七年四月

諭宗人府察行走勤惰議奏普貴原有瘋疾令雖愈不便

令其行走應革退

上以普貴向來行走尚優既稱瘋疾已痊仍着照常行走

雍正元年十月以病削爵

命普貴第十一子智保降襲輔國公三年正月卒以普貴

第十三子蘇保襲封輔國公四年十二月卒以普

貴第七子誠保襲乾隆十九年九月卒諡溫禧以

誠保次子慶春襲封奉恩輔國公三十八年六月

卒以慶春長子恒寧襲杜度第二子穆爾祜天聰

九年五月

命隨貝勒多鐸率師入寧錦界立營以牽制明兵使毋援
山西仍沿途畧地獲馬二百餘克臺一崇德元年
封輔國公七年十月以怨望削爵黜宗室籍順治
元年十一月隨定國大將軍豫親王多鐸南征剿
流賊李自成先後破其二營賊犯我前鋒兵同叅
領鄂博擊敗之我軍近山設伏有賊自山上來犯
又敗之二年授三等鎮國將軍復入宗室三年叙

功晉一等鎮國將軍五月隨豫親王多鐸追騰機
思擊敗土謝圖汗及碩雷汗兵四年三月封輔國
公五年十二月大同總兵姜瓖叛穆爾祜奉

命同敬謹郡王尼堪等討之師至寧武關擊敗賊兵及左
衛賊兵之來犯者六年十月晉封固山貝子九年
七月隨定遠大將軍敬謹親王尼堪征湖南

賜蟒衣鞍馬弓矢師至衡州敬謹親王尼堪戰歿

上命貝勒屯齊代其軍與穆爾祜合營三月明桂王朱由

柳將孫可望與都督馮雙禮軍合我師擊諸周家
坡獲馬七百十一年十月議隨敬謹親王戰歿罪
削爵穆爾祜次子長源於順治十六年降襲三等
鎮國將軍品級康熙三十四年病削爵子察爾岱
降襲三等輔國將軍品級雍正十一年八月卒子
諾爾博降襲三等奉國將軍品級乾隆二十五年
以病休次年卒子鳳文降襲奉恩將軍品級四十
年授三等侍衛五十年授護軍叅領杜度第三子

特爾祜崇德四年八月封輔國公六年隨大兵圍
錦州敗明兵杏山松山間七年三月明總兵祖大
壽降特爾祜移師駐塔山尋克之十月以怨望削
爵黜宗室籍順治元年隨睿親王多爾袞入山海
關破流賊李自成追至望都十一月隨定國大將
軍豫親王多鐸南征敗流賊於潼關二年二月封
輔國公復入宗室十月叙功

賜黃金五十白金二千六年十月晉封固山貝子十五年

二月卒年四十諡恪僖十八年以特爾祜次子噶爾哈圖降襲鎮國公康熙二年卒以其第三子登塞降襲輔國公十二年以登塞係貝子之子改封鎮國公六十一年十二月任宗人府左宗人雍正元年以老休二年卒諡恪恭子瑟爾襲輔國公四年二月任鑲藍旗蒙古都統四月任宗人府右宗人九年管正白旗覺羅學乾隆五年轉左宗人十五年八月卒諡溫僖子額爾經阿襲奉恩輔國公

二十年八月卒次年二月以瑟爾臣次子德明阿襲三月授散秩大臣二十二年以庸情削爵子德尊降襲三等鎮國將軍杜度第七子薩弼崇德七年以兄杜爾祜穆爾祜特爾祜等怨望削爵黜宗室籍薩弼亦從坐順治元年四月隨睿親王多爾袞入山海關擊敗流賊追至望都縣二年二月封輔國公復入宗室三年隨順承郡王勒克德渾征流寇一隻虎於荊州率本旗護軍屢敗賊衆凱旋

賜黃金五十白金千六年十月同親王滿達海剿賊於朔
州寧武並有功十月

詔還京晉封固山貝子十二年二月卒年二十有八謚懷
愍次子固鵠降襲鎮國公十五年三月卒謚悼愍
十八年以薩弼長子巴鵠襲封鎮國公康熙二十
三年正月卒子阿布蘭降襲輔國公五十七年授
宗人府右宗人五十八年任鑲藍旗滿洲都統五
十九年預議政六十一年十一月遷右宗正雍正

元年三月

上諭公阿布蘭入諫和自

皇考任用以來所交事務一心勤慎効力晉封多羅貝勒
二年以奏事不敬降輔國公五年坐擅以

玉牒底本私示隆科多削爵以已鴈孫法爾善襲乾隆元
年六月卒謚和愍次子祿慶襲封奉恩輔國公二
十三年坐守護

陵寢儀樹不謹降三等鎮國將軍二十七年四月卒以祿

慶長子倫成襲

欽定八旗通志卷一百三十二

欽定四庫全書

欽定八旗通志卷一百三十三

人物志十三

宗室王公傳十一

原封和碩貝勒阿敏
溫簡固山貝子固爾瑪渾鎮國公恭

阿德格類
原封和碩貝勒莽古爾泰
原封多羅貝勒

原封和碩貝勒阿敏

阿敏追封莊親王舒爾哈齊第二子初授台吉歲

戊申三月

太祖命同長子褚英征烏拉宜罕山城克之斬千人獲甲

三百俘其衆以歸癸丑正月從

上征烏拉布占泰以三萬衆來拒諸將欲戰

上止之阿敏與貝勒代善等議決進

上從之克其城遂滅烏拉丙辰歲

太祖建元天命封和碩以齒序阿敏為二貝勒四年三月

從

上破明兵於薩爾滸山及尚間崖復奉

命禦明總兵劉綎於棟鄂路代善等繼之陣斬綎阿敏偕
大臣扈爾漢擊敗明遊擊喬一琦兵一琦奔固拉
庫崖與朝鮮都元帥姜功烈合營阿敏同諸貝勒
攻之功烈降一琦自縊八月從

上征葉赫滅之六年三月從

上取明瀋陽遼陽七月鎮江城軍陳良策叛投明將毛
文龍阿敏遷鎮江沿海居民於內地十一月文龍
屯朝鮮阿敏渡鎮江夜入朝鮮境斬其守將及兵

千五百文龍僅以身免十一年四月征喀爾喀巴
林部取所屬屯寨十月征喀爾喀扎魯特部俘其
衆還天聰元年正月

命同貝勒濟爾哈朗阿濟格杜度等征朝鮮瀕行

諭之曰朝鮮屢世獲罪理宜聲討然此行非專伐朝鮮也
明毛文龍近彼海島倚恃披猖納我叛民故整旅徂征
如朝鮮可取則並取之因

親授方畧是月大兵薄義州拔其城分兵擣文龍所居鐵

山文龍遁海島師克宣州連定三城次平壤朝鮮
王李侗遣使請和阿敏書數其罪七次黃州侗復
請和阿敏欲進攻諸貝勒議許盟事詳克勤郡王
傳凱還

上郊勞于武靖營

賜御衣一襲五月從

上征明錦州復圍寧遠擊斬千餘人四年正月大兵克永

平灤州遷安三月

命阿敏代貝勒濟爾哈朗等駐守師至合畧迤西路並招降榛子鎮四月諭歸降漢文武官曰我國法度從來賄賂不行廉者舉之貧者弗錄況

皇上簡用者俱廉潔忠直之士爾等若有罪雖賂千金無益若無罪即衆貝勒何懼焉五月明監軍道張春等圍灤州阿敏怯不赴援灤州陷阿敏遽棄永平殺降者夜出冷口歸六月

上御殿諸貝勒大臣議阿敏十六罪

上命岳託宣示於衆諸貝勒大臣合詞請誅阿敏

詔特宥其死削爵幽禁崇德五年十一月卒於幽所爵除

溫簡固山貝子固爾瑪渾

子瓦三

曾孫鄂齊

固爾瑪渾貝勒阿敏第三子崇德三年九月隨睿親王多爾袞征明由北京至山西復東至濟南克城四十餘年四月凱旋

賜馳一馬一白金二十是年封輔國公先是內大臣多爾

爾濟所屬蒙古及漢人盜馬自伊嚕逃

命同鎮國公扎喀納等伺諸藩城間既望見以渫不追而還八月議削爵

詔予寬免五年六月以父阿敏獲罪坐削爵黜宗室順治五年四月復入宗室封輔國公六年正月隨鄭親王濟爾哈朗征湖廣擒何騰蛟於湘潭進師永興奪門入固爾瑪渾俱在事有功凱旋

賜白金六百十月晉封固山貝子康熙二十年十月卒謚曰溫簡長子瑪爾圖封鎮國公先卒乃以第四子

瓦三降襲輔國公瓦三初於康熙四年正月封三等輔國將軍十三年十月隨安親王岳樂征江西進定湖廣十八年十一月還京二十年十二月降襲輔國公二十一年八月授宗人府右宗人二十二年三月議瓦三前在長沙退縮罪應削爵

諭曰瓦三才具甚優況其公爵乃伊父貝子固爾瑪渾効力年久恩賜之爵著革去右宗人從寬留其公爵二十三年四月任鑲藍旗蒙古都統五月調鑲藍旗滿

洲都統先是俄羅斯竊據雅克薩尼布楚二城

上命黑龍江將軍薩布素收其田禾以困之薩布素以失
機請罪是年

命瓦三偕侍郎果丕會薩布素議雅克薩應否攻取嗣奏
我兵於來年四月抵雅克薩招撫不就撫則攻其
城萬一難取即遵前

旨毀田禾以歸

上命都統朋春等會勦十二月議政王大臣奏請黑龍江

將士應遣大臣統轄得

旨軍機關係緊要非熟練戎行者不可公瓦三素諳行師
遣往必能勝任護軍統領佟寶佛可託皆堪効力之人
可令公瓦三統轄之二十四年正月卒諡曰襄敏以瓦
三之次子齊克塔哈襲封輔國公三十二年十二
月任宗人府右宗人三十五年正月從

上征噶爾丹護軍統領鄂克濟哈統領正紅旗營二十九
年四月薨永定河

命齊克塔哈分董其事四十年正月任正黃旗蒙古都統
四十六月五月以鑽營削爵以固爾瑪渾之孫鄂
斐襲輔國公鄂斐瑪爾圖第四子初於康熙六年
三月封三等奉國將軍三十三年五月任鑲藍旗
蒙古副都統三十五年正月從

上征噶爾丹同康親王傑書統領鑲藍旗營三十八年調
正紅旗蒙古副都統三十九年調正黃旗滿洲副
都統四十二年擢正黃旗漢軍都統尋調正黃旗

滿洲都統四十一年授領侍衛內大臣四十六年
襲封輔國公四十七年任宗人府左宗人五十二
年八月卒至雍正三年以鄂斐第五子鄂齊襲鄂
齊初於康熙三十八年封奉恩將軍四十八年緣
事削爵尋授散秩大臣雍正三年五月任正黃旗
漢軍副都統十一月以陝甘總督岳鍾琪奏請將
羅隆宗諸部給達賴喇嘛管理遣大臣往諭

命鄂齊偕學士班第會提督周瑛詳籌妥辦嗣鄂齊奏臣

至西藏審視情形首領辦事者互不睦請降

旨諭達賴喇嘛等和衷共事

詔允之十二月

諭曰鄂齊自委任以來竭力行走差往西藏辦事明白著

將伊父鄂斐未襲之輔國公爵給與承襲四年十月擢

鑲黃旗漢軍都統五年七月晉鎮國公十一月調

天津水師營都統六年九月以兵丁滋事削爵授

三等侍衛効力七年二月任正紅旗滿洲副都統

十月奏請八旗訓練必弓箭相稱嫻熟中的為要
除官射用披子箭外常箭俱用髀頭則指發與梅
針箭同視製披子箭價亦省議從之九年八月署
鑲紅旗蒙古都統十一年正月革任爵除

鎮國公恭阿

恭阿貝勒阿敏第四子阿敏既獲罪恭阿廢為庶
人後復入宗室順治五年九月隨鄭親王濟爾哈
朗征湖廣六年正月大軍抵長沙擒明桂王朱由

柳之總督何騰蛟等進勦廣西合兵定道州及黎平府先後克六十餘城恭阿俱在事有功十月封鎮國公十一月卒於軍八年閏二月以恭阿之長子法塞降襲輔國公康熙四十九年正月卒十月以法塞長子原封三等奉國將軍阿裕爾仍降襲三等奉國將軍五十八年卒十二月以閑散宗室德色勒之長子蘇赫訥降襲奉恩將軍阿裕爾之孫也雍正二年七月卒爵除

原封和碩貝勒莽古爾泰

莽古爾泰

太祖高皇帝第五子歲壬子九月從

上征烏拉克城六莽古爾泰等請渡水進擊

上止之曰我且削其外城無僕無以為主無民無以為君

遂燬所得六城移駐富勒哈河越日於烏拉河建

木城留兵千守之天命元年授和碩貝勒以齒為

序莽古爾泰為三貝勒四年三月明總兵杜松等

率師六萬出撫順關

上親統師迎擊莽古爾泰從至界藩設伏薩爾澍谷口明
兵過將半尾擊之我師據界藩之吉林崖明兵營
薩爾澍山以二萬衆來攻吉林莽古爾泰同大貝
勒代善等以兵千衛吉林復合力攻薩爾澍山破
之又破明兵於尚間崖時明總兵劉綎出寬甸畧
棟鄂

上命同代善等禦之至瓦爾哈什窩集擊敗明兵二萬陣

斬縱事詳禮烈親王傳八月從

上征葉赫圍其城其貝勒布揚古及弟布爾杭古降葉赫

平五年八月

上征明由懿路蒲河進明兵出瀋陽城者各引退

諭莽古爾泰領本部追之莽古爾泰遂率健銳百人追敗

總兵李秉誠副將趙率教兵越瀋陽城東至渾河

始返六年七月鎮江城降將陳良策叛投明總兵

毛文龍莽古爾泰同代善遷金州民於復州十年

正月明葺城守旅順口攻克之殲其衆十一月率師援科爾沁解其圍十一年四月

上征喀爾喀巴林部

命代善諸貝勒畧西拉木倫諸貝勒以馬乏不能進莽古

爾泰獨領兵夜渡擊之俘獲無算天聰元年五月

攻明右屯衛又以偏師衛塔山糧運三年十月從

上征明貝勒阿巴泰阿濟格先從龍井關入斬明漢兒莊

副將易愛等莽古爾泰偕貝勒多爾袞多鐸至其

守將遂以城降並招撫潘家口守備金有光中軍
范明良蔣進喬翌日

上統師克洪山口趨遵化莽古爾泰自漢兒莊合營敗明
山海關總兵趙率教兵擒其副將威調元旋奉

命赴通州視渡口是月大軍進薄京城明諸道兵入援屯
廣渠門外莽古爾泰分遣護軍前行令阿巴泰阿
濟格等攻之追殺至城壕莽古爾泰與貝勒多鐸
留後值明潰卒來犯擊殲之十二月從

上視薊州破明山海關援兵四年二月克永平遵化適與
明兵遇敗之五年三月

命諸貝勒直言時政莽古爾奏曰讞獄據供詞以定是
非未敢明知枉斷惟恐日久怠生臣與諸貝勒大
臣倍加策勵八月從

上圍明大凌河城正藍旗兵圍其南莽古爾奉軍其中為
策應九月敗明監軍道張春總兵吳襄等援兵事
詳禮烈親王傳十月議莽古爾奉於

御前露刃大不敬罰銀萬兩撤五佐領歸公六年五月從上征察哈爾林丹汗遁移師征明歸化城畧大同宣府七月師還十二月薨年四十六

上臨哭丙夜始還翌日設

幄議祭奠焉是夜乃

還宮九年十二月以所屬追首其罪削爵黜宗室詳德格

類傳

原封多羅貝勒德格類

德格類

太祖高皇帝第十子初授台吉天命六年二月大軍畧明
奉集保將旋有小卒指明兵所在德格類同台吉
岳託碩託擊敗明兵二百追逼明總兵李秉誠營
其衆二千潰遁三月同台吉寨桑古閱三岔河橋
至海州城中官民張樂輿迎德格類令軍毋擾民
奪財物士皆登城宿勿入民室次日安撫居民而
還八年四月同台吉阿巴泰征喀爾喀扎魯特部

十一年十月復隨大貝勒代善征扎魯特部是年
封多羅貝勒天聰三年九月同貝勒濟爾哈朗等
略明錦州焚其積聚俘獲無算五年六月

命諸貝勒直言時政德格類奏曰國家要在慎選正直任
以國事屏讒邪遠姦佞則賢不肖皆知取法臣等
與諸貝勒皆以公正自持効忠竭力至讞獄或刑
罰不中請即罷斥另選良臣任法司則政簡刑清
國家何憂不太平七月初設六部

命理戶部事八月從

上圍明大凌河城正藍旗兵圍其南德格類軍其中為策

應九月敗明監軍道張春總兵吳襄等援兵事詳

禮烈親王傳十月明總兵祖大壽降同貝勒阿巴

泰夜襲錦州擊斬甚衆事詳饒餘敏郡王傳六年

五月同貝勒濟爾哈朗等俘察哈爾部衆於歸化

城及黃河諸路九月同貝勒岳託等拓疆自耀州

展至益州迤南七年六月攻旅順口克之八年五


月從大軍征明六月招撫蒙古來歸戶衆七月克獨石口進攻赤城未拔入保安州會大軍於應州師還九年十月薨年四十

上臨哭丙夜乃還設

幄而居撤饌三日諸貝勒大臣勸慰再三始

還宮十二月同母兄莽古爾泰為屬下冷僧機所告以大

逆削爵除籍德格類其母弟曾與謀亦追削貝勒黜宗室爵除順治九年冷僧機以奸惡伏誅



欽定八旗通志卷一百三十三